

- Imperet, et blandos offerat unda sinus,
 Desuper á lumbis, á renibus exuor infra,
 Inferor, et rursum me super arte fero,
 Vel placet alternis undas vexare lacertis,
 70 Vel pisces variis ludificare modis.
 Decipit hos hamus, capiuntur retibus illi:
 Innumeros secum tracta sagena trahit.
 Sic capitur lucius, rapidus populator aquarum,
 In genus exercens gutturis arma suum.
 75 Sic qui nobilitat barbato prandia mento,
 Et qui cum floret candida spina valet,
 Quique rubet maculis, et qui, nisi quarta vocalis
 Sit geminata, potest in Salomone legi¹,
 Suspectusque cibus, nisi vino sepe sepultus,
 80 Que sibi cognato nomen ab angue trahit².
 Sic et alumna luti, sic que conceditur egris,
 Corpore squamoso spinea terga gerens;
 Sed neque pisciculi remanent in gurgite tuti,
 Sed rapit aptatis ars mea quemque dolis.
 85 Sic etenim capitur, capud est pars maxima cuius,
 Et quem non sperni gobio³, Flace, doces.
 Queque cibus vulgi, color est argenteus illi,
 Cuique suum merito nomen arena dedit.
- Nobilium volucrum si claustris tempus apertis
 90 Solverit armigeros in nova bella pedes,
 Prosilit e stabulo faleris rutilantibus auro
 Insignis sonipes ante ferendo pedes.
 Nitor equo, sedes me suscipit aurea, frenum
 Dextra, sinistra gerit nobile pondus avis.
 95 Mecior ergo suis spoliatos messibus agros,
 Doctus ad aucupium cursitat ante canis.
 Impiger assequitur fugientem nisus alaudam,
 Et pater in natam dirigit arma suam.
 Quod si littorei revocentur gaudia ludi,
 100 Inter maiores bella moventur aves.
 Unguibus accipiter rapidisque in flumina pennis
 Fulminat, et vacuo pellis in orbe tonat.
 Hoc anas in bello capitur corvusque marinus,
 Et qui terrifico mugit in amne sono.
 105 Sic qui Priamides quondam fuit Esacus, at nunc
 Mergus ab assiduo mergere nomen habet⁴.
 Cinnus⁵ Achilleo iam dudum marte subactus,

1) Nämlich salmo. 2) Anguilla. 3) Gründling; er kommt bei Ovid vor, Halient. v. 130, was aber Guido schwerlich wusste, und bei Martial XIII, 88, aber nicht bei Horaz. 4) Ovidii Met. XI, 762 ff.
 5) Cynus, Met. II, 367 ff.